



Važeća legislativa iz oblasti hrane/hrane za životinje u Bosni i Hercegovini zasnovana je na preuzetim propisima iz bivše SFRJ. Činjenica da dio tih propisa datira iz sedamdesetih godina i da nisu svojim izmjenama pratili nova saznanja i promjene koje su nastupile, dovoljno govori o potrebi njihovog revidiranja. Političko opredjeljenje Bosne i Hercegovine je da se u toku 2008. godine ispune uslovi za potpisivanje Sporazuma o stabilizaciji i pridruživanju sa Evropskom zajednicom, nameće imperativ da se legislativa Bosne i Hercegovine o hrani/hrani za životinje uskladi sa pravnim naslijeđem Evropske unije. Legislativa Bosne i Hercegovine, čija je izrada planirana, mora unijeti i odrednice obvezujućih propisa međunarodnih organizacija i institucija (sporazume, standarde, pravila i preporuke) s ciljem uklanjanja prepreka ka slobodnom protoku ljudi, roba, usluga i kapitala na i kroz svojoj teritoriji otvarajući se svjetskom tržištu.

Zemlje članice Evropske unije (EU) bave se procjenom rizika od hrane i zaštitom zdravlja potrošača, uz istovremeno uvažavanje svih različitosti, u prehrambenim navikama, religiji, socijalnom statusu, kulturi i načinu pripremanja hrane. Sve navedene specifičnosti EU svodi u jedinstven pravni sistem, samo sa jednim ciljem, zaštita zdravlja potrošača i dobrobiti životinja, što je i osnovni zadatak svih agencija za sigurnost hrane.

Sigurnost hrane je postala jednim od glavnih prioriteta EU i u nju se dosta ulaže, a posebno u okviru naučno-istraživačkih projekata kontrole kvaliteta i sigurnosti hrane.

Zakon o hrani („Službeni glasnik BiH“, broj 50/04) je usklađen sa Opštim zakonom o hrani Evropskog Parlamenta (General Food Law - EC Regulation No 178/2002). Odredbama Zakona predviđeno je formiranje Agencije za sigurnost hrane BiH. Agencija za sigurnost hrane BiH je formirana odlukom Vijeća ministara BiH u 2004. godini. Agencija je formirana kao samostalna upravna organizacija koja za svoj rad odgovara Vijeću ministara BiH. Tijela Agencije su:

- Upravni odbor,
- Direktor,
- Savjetodavno vijeće,
- Naučno vijeće i naučni odbori

Upravni odbor Agencije ima 15 članova, a sačinjavaju ga predstavnici:

- a. Ministarstva vanjske trgovine i ekonomskih odnosa Bosne i Hercegovine;
- b. Ureda za veterinarstvo Bosne i Hercegovine;
- c. Uprave Bosne i Hercegovine za zaštitu zdravlja bilja;
- d. Federalnog ministarstva zdravstva;
- e. Ministarstvo zdravlja i socijalne zaštite Republike Srpske;
- f. Federalnog ministarstva poljoprivrede, vodoprivrede i šumarstva;
- g. Ministarstva poljoprivrede, vodoprivrede i šumarstva Republike Srpske;
- h. Federalnog ministarstva trgovine;
- i. Ministarstva trgovine i turizma Republike Srpske;
- j. Vlade Brčko Distrikta;
- k. entitetskih ministarstava nadležnih za prehrambenu industriju;

a ostala tri člana Upravnog odbora imenuje Vijeće ministara na osnovu posebnih propisa.

Odredbe Zakon o hrani, predviđaju da Agencija za sigurnost hrane BiH u sklopu obavljanja svojih redovnih poslova i zadataka u saradnji sa nadležnim organima Bosne i Hercegovine, entiteta i Brčko distrikta Bosne i Hercegovine inicira, priprema i organizuje izradu pravnih



propisa iz oblasti hrane/hrane za životinje. U sačinjavanju prijedloga Programom rada za 2008. godinu Agencija za sigurnost hrane BiH je, uvažila zahtjeve nadležnih organa, proizvođača, prerađivača i potrošača u Bosni i Hercegovini, za izradu određenih pravnih propisa.

Na svojoj VI sjednici, održanoj 30.01.2008. godine u Banja Luci, Upravni odbor je jednoglasno usvoji predloženi Program rada Agencije za 2008. godinu. Vijeće ministara BiH je razmatralo i na 51. sjednici održanoj 03.06.2008. godine usvojilo Program rada.

Kako bi se navedene aktivnosti provodile postupno i koordinirano, sačinjeno je *Uputstvo o pripremi i izradi nacrtu pravnih propisa iz oblasti hrane/hrane za životinje u Agenciji za sigurnost hrane Bosne i Hercegovine*. Za izradu svakog od ukupno 18 propisa predviđena su četiri radna sastanka koji se održavaju na cijeloj teritoriji Bosne i Hercegovine, Mostaru, Sarajevu, Banja Luci i Brčkom. Do kraja trećeg kvartala je planirano završiti rad s radnim grupama i pripremljeni materijal poslati Vijeću ministara Bosne i Hercegovine na donošenje.

Ovaj program, kao i do sada urađene aktivnosti, trebao bi biti temeljni vodič za unapređenje sigurnosti hrane u Bosni i Hercegovini, a Agencija za sigurnost hrane, kao temeljna institucija zadužena za koordinaciju aktivnosti u svezi sigurnosti hrane, nastoji svojim radom biti prepoznatljiva kako u Bosni i Hercegovini tako i šire.